

Naqqiut

Saqqummiussissut 9. marts 2026-meersoq taarserpaa
(Naalakkersuisup taaguutaa naqqiutigineqarpoq)

Kalaallit Nunaanni Namminersorlutik Oqartussanit uuma akuerineqarnissaa pillugu Inatsisartut aalajangiiffigisassaattut siunnersuut: Nunani allamiut pillugit inatsisip allannguutaa pillugu inatsisip assigiinngitsut ilaannik Kalaallit Nunaannut atuutilersitsineq pillugu peqqussummut siunnersuut (Kalaallit Nunaanni najugaqarsinnaanermut suliat suliarineqarnerinut akiliut pillugu malittarisassanik atulersitsineq, siviruserumik najugaqarsinnaanermut visumimik atuutilersitsineq, Schengeninformationssystem (SIS)-mik atuneq, killeqarfinnik avasinnerusunik il.il. nakkutilliinerup sunniuteqarluarnissaanik pitsanngorsaaneq siunertaralugu Schengenimut malittarisassanik naammassisaqarnek siunertaralugit, nunamut isertitsinnaatitaannginneq pillugu aalajangiinnermut aamma nunamiit aallarnissamut piffissaliussat pillugit malittarisassanik allanngiineq)
(Isumaginninnermut, Suliffeqarnermut, Ilaqtariinnut Nunamullu Namminermut Naalakkersuisoq)

Saqqummiussissut

(Isumaginninnermut, Suliffeqarnermut, Ilaqtariinnut Nunamullu Namminermut Naalakkersuisoq)

Siullermeerneqarnera

Kalaallit Nunaanni Namminersorlutik Oqartussanit akuerineqarnissaa pillugu Inatsisartut aalajangiiffigisassaattut siunnersuut: Nunani allamiut pillugit inatsisip allannguutaa pillugu inatsisip assigiinngitsut ilaannik Kalaallit Nunaannut atuutilersitsineq pillugu peqqussummut siunnersuut.

Nunani allamiut pillugit inatsip peqqussutitigut nr. 150, 23. februar 2001-imeersutitigut Kalaallit Nunaanni pissutsit tunngavigalugit allannguutitalik Kalaallit Nunaannut atuutilersinneqarnikuuvoq. Kalaallit nunaani nunanut allamiunut inatsimmi siunnersuutip allannguutaasa aqqiinnermut assigiinngitsunut aamma EU-mi peqqussutinut Schengenimi suleqatigiinnermut annertuumik isumaqarsinnaasut kiisalu killeqarfinnik nakkutilliinnermut annertunerumik kalallit nunaanni atornerneqarnissaanut periarfissiisaaq. Peqqussutip Naalagaaffeqatigiinnermi nunami allamiut pillugit suliasaqarfimmi malittarisassanik assigiisaaqataa nunaanni allamiut pillugit suliasaqarfimmik killeqarfinnilu nakkutilliinnermik assigiisaaarinnissamut pisariinnerumillu ingerlatsinissamut iluaqutaanissaa aamma naatsorsuutigineqarpoq. Tamatuma saniatigut siunnersuutip imarai kalaallit nunaanni malittarisassat ingerlanneqartarnerini inatsisitigut teknikikkut allannginerit.

Siunnersuummi ilaatigut pineqarput nunamut isersinnaanermik inerteqquteqarnermut aallarnissamullu piffissaliussanik aalajangersaasarnermut Nunamit anisitsinnermut malitassami aalajangersakkanik atuutilersitsineq, taamaalilluni aalajangiinnerit tamakku Schengeninformationssystemimut (SIS) nalunaarutigineqarsinnaalerlutik. Peqatigisaanillu nunami isersimasinnaanermut aamma aalajangiinnerit nangeqqinneqarneranni qinnuteqaatit arlallit suliarineqarneranni nunami najugaqarallarsinnaaneq aalajangiusimaneqarput.

Tamatuma saniatigut naammagittaalliuteqarnermi sivitsuinissamillu qinnuteqarnermi aalajangiinerit aalajangersimasut taamaatikallarneqarsinnaanissaat periarfissaalissaaq.

Siunnersuummi najugaqarsinnaanermut akuersissutinik assigiissumik suliaqartarnissamut EU-mi peqqussummik kiisalu systemit suleqatigiissinnaanissaannut EU-mi peqqussummik atuutilersitsinermi, ilaatigut najugaqarsinnaanermut akuersissutinik issuaanissamik peqquserlullunilu allangortitsinissamik pinaveersaartitsinissaq inerteqqutaasumillu nunasisarnernik pinaveersaartitseqataanissaq akiueqataanissarlu kiisalu killeqarfinni nakkutilliinerup pitsanngorsarnissaa siunertaapput. Tamatuma saniatigut nunami allamiut, matumani angallattunik nakkutilliinermut atatillugu inuup ilisarnaataasigut kinaassuserseeriaatsimut paasissutissanik (biometri), tikittunik aallartunillu nalunaarsuissummi atugassanik tunniussinissaannut tunngavissamik ilanngussisoqarpoq.

Siunnersuutaaq Kalaallit Nunaanni ukioq ataaseq tikillugu sivisuumik najugaqarsinnaanermut akuersissummi tunniussinissamut tunngavissamik imaqarpoq. Tassuunakkut nunami allamiut, najugaqarsinnaanernik aalajangersimasumik piunasaqaatitalerlugu akuerineqarsimasut Kalaallit Nunaannut tikissinnaalissapput najugaqarsinnaanermullu kortimik inummut ilisarnaatitalimmik tunineqarsinnaalerlutik.

Aaqqissuussineq, qinnuteqartut aalajangersimasut najugaqarsinnaanermut akuersissummi qinnuteqarnermut kiisalu suliap aallarteqqinnissaanut qinnuteqarnermut atatillugu akiliuteqarnissaannik pisussaaffiliisoq akiliutinik aningaasalersuineq pillugu danskit nunami allamiut inatsisaanni § 9 h-p atuutilersinnerani eqqunneqassaaq. Akiliutissap annertussusissaani aningaasartuutit tunngavigineqassapput aammalu Namminersorlutik Oqartussanik isumaqatiginninniarnep kingorna Nunanut Allamiunut Peqataalersitsinermullu ministereqarfiup nalunaarummi atuutilersitaani aalajangersarneqassalluni.

Danskit nunami allamiut pillugit inatsisaanni § 9 a, imm. 9-mik, Kalaallit Nunaanni pissutsit tunngavigalugit allannguutitalerlugu atuutilersitsinerup kingunerisaanik siunissami Kalaallit Nunaanni atorfik pissutigalugu najugaqarsinnaanermut akuersissummi qinnuteqaat itigartinneqartalissaaq, atorfinitsitsinermut isumaqatigiissut aalajangersimasoq suliffimmi inerteqqutaanngitsumik aaqqiagiinngitsoqarneranut atappat. Tamatuma kingunerisaanik suliffimmi inerteqqutaanngitsumik aaqqiagiinngitsoqarneranut atatillugu sulisunut taarsiutitut nunanit allaniit sulisunik suliffeqarfiit sulisussarsiorsinnaajunnaassapput.

Naalakkersuisut taamatut oqaaseqarlutik aalajangiiffigisassatut siunnersuut Inatsisartunut suliassanngorlugu tunniuppaat.